

III. IDENTIFIKASHON DI SPIRITU SANTU

Nos a purba identifiká presis ken Spiritu Santu ta. Nos a mira ku E ta 1) un persona i 2) un persona divino. Awor nos ke mira kon Spiritu Santu ta yama. Nos lo mira dos esaki di dos ángulo: 1) Nòmbernan di Spiritu Santu i 2) Símbolonan di Spiritu Santu.

A. NÒMBERNAN DI SPIRITU SANTU

Ta impusíbel pa un hende konosé Dios dor di su mes esfuerso! Dios ta tan transedente ku si E no ta revelá Su mes, ta imposibel pa hende por konos’E! Ma Dios den Su gracia a skohe pa revelá Su mes na hende. Un di e maneranan ku El a revelá Su mes ta dor di Su nòmbernan. Nos por siña konosé mas di Dios dor di studia Su nòmbernan.

Ora nos yu a nase, nos no tabata sigur kiko su nòmber lo ta. Promé ku mi esposa i beibi a bin kas for di hospital, nos a sinti preshon pa dun’é un nòmber, pa identifiká e yuchi. Hòspital mester a dokumentá su nòmber. E dokumentonan ei lo bai na gobièrnu. Pa henter su bida, e persona aki—awor den su infansia—lo ta konosí pa e nòmber ei. Identidat ta un motibu ku nos pa duna nòmber. Nos tambe ta duna yu nòmber pasobra nos ta gusta kon e nòmber ta zona, òf pasobra nos ta apresiá un persona asina tantu ku nos ta duna nos yu nòmber di e persona.

Nòmbernan den Beibel, ku frekuensia tin gran importansia. Den era di Beibel, ku frekuensia nan a duna nòmber na un persona pa deskribíE. Dios a kambia nòmber di “Abram” (ku ta nifiká tata eksaltá) i a hasié “Abraham”—loke Dios a primintí ku e lo ta: tata di un multitud. Un yu di Isaak i Rebeka tabata yamá “Jakob”, nifikando gañadó. Esei ta presis loke e tabata. Ma Dios a transformá su bida i a dun’é e nòmber “Israel”, ku ta nifiká prens ku Dios. Ora Hesus a enkontrá un apòstel, su nòmber tabata “Simon” (nifikando piedra). Ma dor di su relashon personal ku Hesus, su bida tabata kambiá, i Hesus a kambia Su nòmber pa “Pedro”, nifikando baranka.

E nòmbernan di Dios hañá den Beibel t’ei pa un proposito importante. Su nòmbernan no solamente ta pa identifiká Su mes. Su nòmbernan tambe ta pa deskribí Su mes na hende!

Den Skritura, nos ta enkontrá diferente nòmber pa Dios Tata i Dios Yu. Mèskos ku nan tin sierto nòmber ku ta deskribi nan pa nos, igualmente Spiritu Santu tin sierto nòmber ku ta deskribí Su persona i Su obranan. Nos lo lista e nòmbernan huntu ku e referensianan sin hopi komentario:

1. Nòmbernan den Tèstament Bieu

a. Spiritu

Numbernan 11:17,25,26,29; 27:18; 1 Krónikanan 12:18; Nehemias 9:30; Salmo 104:30; 106:33; 139:7; Isaias 30:1; 32:15; 34:16; 42:1; 44:3; 48:16; 59:21; Ezekiel 2:2; 3:12,14,24; 8:3; 11:1,24; 36:27; 37:14; 39:29; 43:5; Joel 2:38-39; Mikeas 2:7; Hageo 2:5; Zakarias 4:6; 7:12; Malakias 2:15

b. Spiritu di SEÑOR (YHWH/YEHOVA)

Huesnan 3:10; 6:34; 11:29; 13:25; 14:19; 15:14; 1 Samuel 10:6; 16:13,14; 2 Samuel 23:2; 1 Reinan 18:12; 22:24; 2 Reinan 2:16; 2 Krónikanan 18:23; 20:14; Isaias 11:2; 40:13; 63:14; Ezekiel 11:5; 37:1; Mikeas 3:8

c. Spiritu di Dios

Gènesis 1:1; Eksodo 31:3; 35:31; Numbernan 24:2; 1 Samuel 10:10; 11:6; 19:20,23; 2 Krónikanan 15:1; 24:20; Job 33:4; Ezekiel 11:24

- d. Spiritu di e Señor DIOS (ADONAI YHWH)
Isaias 61:1
 - e. Bo Spiritu Santu
Salmo 51:11; Isaias 63:10-11
E ta yamá Spiritu *Santu* solamente tres biaha den Tèstamènt Bieu. En kontraste, esaki ta un di e nòmbernan mas frekvente den Tèstamènt Nobo.
 - f. Mi Spiritu
Gènesis 6:3
 - g. Bo bon Spiritu
Nehemias 9:20; Salmo 143:10
 - h. Spiritu di gracia i di sabiduria
Zakarias 12:10
 - i. Spiritu di SEÑOR...e Spiritu di sabiduria, komprendementu, konseho, poder, konosementu i temor di SEÑOR
Isaias 11:2
2. Nòmbernan den Tèstamènt Nobo
- a. Spiritu
Mateo 4:1; 10:20; 12:18; 22:43; Marko 1:10,12; Lukas 2:27; 5:9; 6:3,10; 8:18,29; 10:19; 11:12,28; 21:4; Romanonan 2:29; 7:6; 8:4,5,9,11,13,16,23,26-27; 15:19,30; 1 Korintionan 2:4,10,12,13; 12:4,7-9,11,13; 2 Korintionan 1:22; 3:6,8,17,18; 5:5; Galationan 3:2,3,5,14; 4:29; 5:5,16-18,22,25; 6:8; Efesionan 2:18,22; 3:5,16; 4:3,4; 5:18; 6:17,18; Filipensenan 2:1; Kolosensenan 1:8; 1 Tesalonisensenan 5:19; 2 Tesalonisensenan 2:13; 1 Timoteo 3:16; 4:1; 1 Pedro 1:2; 1 Juan 3:24; 4:13; 5:7-8; Judas 19; Revelashon 1:10; 2:7,11,17,29; 3:6,13,22; 14:13; 22:17
 - b. Spiritu Santu
Mateo 1:18,20; 3:11; 12:32; 28:19; Marko 1:8; 3:29; 12:36; 13:11; Lukas 1:15,35,41,67; 2:25,26; 3:16,22; 4:1; 10:21; 11:13; 12:10,12; Juan 1:33; 14:26; 20:22; Echunan 1:2,5,8,16; 2:4,33,38; 4:8,31; 5:3,32; 6:5; 7:51,55; 8:15,17,19; 9:17,31; 10:38,44,45,47; 11:15,16,24; 13:2,4,9,52; 15:8,28; 16:6; 19:2,6; 20:23,28; 21:11; 28:25; Romanonan 5:5; 9:1; 14:17; 15:13,16; 1 Korintionan 6:19; 12:3; 2 Korintionan 6:6; 13:14; 1 Tesalonisensenan 1:5-6; 4:8; 2 Timoteo 1:14; Tito 3:5; Hebreonan 2:4; 3:7; 6:4; 9:8; 10:15; 1 Pedro 1:12; 2 Pedro 1:21
Esaki sigur ta un di Su nòmbernan mas prominente: Spiritu *Santu*. Ta parse ku santidat ta Su atributo òf kalidat mas prominente! No solamente E mes ta santu ma E tambe ta produsí santidat!
 - c. Spiritu di Dios
Mateo 3:16; Romanonan 8:9,14; 1 Korintionan 2:11,14; 3:16; 7:40; 12:3; Filipensenan 3:3; 1 Juan 4:2
 - d. Spiritu di Hesus
Echunan 16:7
 - e. Spiritu di Kristo
Romanonan 8:9; 1 Pedro 1:11
 - f. Spiritu di Hesu-Kristo
Filipensenan 1:19
 - g. Spiritu di e Señor
Lukas 4:18; Echunan 8:39; 2 Korintionan 3:17
 - h. Spiritu Santu di Dios
Efesionan 4:30
 - i. Spiritu di nos Dios

- 1 Korintionan 6:11
- j. Spiritu di boso Tata
Mateo 10:20
 - k. Spiritu di Su Yu
Galationan 4:6
 - l. Spiritu Santu di promesa
Efesionan 1:13
Spiritu Santu a bin komo resultado di Kristo Su promesa pa pidi e Tata pa mand'E (Juan 14:16,26). Tambe Spiritu Santu ta sigurá e kreyente ku tur e promesanan ku a Dios hasi, lo wòrdu kumplí!
 - m. Spiritu di Esun ku a lamta Hesus di morto
Romanonan 8:11
 - n. Spiritu di e Dios bibu
2 Korintionan 3:3
 - o. Spiritu etèrno
Hebreonan 9:14
 - p. Spiritu di bèrdat
Juan 14:17; 15:26; 16:13; 1 Juan 5:6
Spiritu Santu no tin nada di hasi ku mentira. E ta oponé kontra tur loke no ta bèrdat! Si e Spiritu di Bèrdat ta biba den nos, nos bidanan mester refleh'E. Nos mester hui tur mentira i stima bèrdat!
 - q. Spiritu di santidat
Romanonan 1:4
 - r. Spiritu di bida
Romanonan 8:2
 - s. Spiritu di grasía
Hebreonan 10:29
 - t. Spiritu di gloria i di Dios
1 Pedro 4:14
 - u. E shete Spiritunan
Revelashon 1:4
 - v. E shete Spiritunan di Dios
Revelashon 3:1; 4:5; 5:6
 - w. PARAKLETOS
Juan 14:16,26; 15:26; 16:7

Nos ya kaba a kompartí algu tokange e palabra griego PARAKLETOS. E palabra aki ta formá di dos palabra griego PARA (nifikando, na banda di) i KALEO (ku ta nifiká, pa yama). Pues, nifikashon di PARAKALEO ta “pa yama na banda di”. I nifikashon di e palabra, PARAKLETOS, ta “esun ku ta yamá na banda di”. E ta yamá na banda di un persona pa sierto proposito: pa yuda, defendé, roga pa, interstedé pa, èts. Hesus ta yamá nos PARAKLETOS (“*Abogado*”) den 1 Juan 2:1. Den e teksto ei, e tin idea di un asistente legal, un ku ta pleita kaso di un otro. Den Juan 14-16, kuater biaha Spiritu Santu ta yamá PARAKLETOS (“*Konsolador*”). E konteksto ta indiká ku Spiritu Santu lo hiba nan mas profundo den e Bèrdat, lo fortifiká nan den perekushon, èts. Kon agradisidu nos mester ta ku nos PARAKLETOS semper t’ei ora nos tin mester di dje!

B. SÍMBOLONAN DI SPIRITU SANTU

Dios no solamente a usa nòmbernan pa laga nos sa mas tokante Su persona. Ma Dios tambe a usa lenguahe simbóliko. Den Skritura, nos por nota diferente símbolo ku ta usá di Spiritu Santu pa nos por siña konos’E mas mihó.

Ma promé ku nos ta studia e símbolonan, ta bon pa nos duna un spiertamentu. Un difikultat ku tin ku símbolonan ta ku nos no sa tur ora presis na kiko e símbolo ta referí. Nos

mester ta kouteloso pa no imponé nos ideanan pa determiná e nifikashon. Asina tantu ku ta pusíbel, nos mester laga Skritura determiná nifikashon di e símbolo. Ma frankamente bisá, ningun teksto relashoná ku e símbolonan ku nos lo menshoná ta bisa kategórikamente kiko e interpretashon korekto ta. Pues, kòrdando esei, nos lo opservá algun símbolo ligá ku Spiritu Santu den Skritura i surjerí algun pusíbel nifikashon—ma kòrdando ku nos no sa sigur:

1. Palomba

Segun Mateo 3:16, “*I despues di a wòrdu batisá, Hesus a sali mesora for di awa; i ata, e shelunan a wòrdu habrí i El a mira e Spiritu di Dios baha manera un palomba i keda riba djE*” (Marko 1:10; Lukas 3:22; Juan 1:32). Kisas esaki ta e símbolo mihó konosí.

Kiko presis Dios ke komuniká ku nos tokante Spiritu Santu dor di e símbolo aki no ta konosí. Studiantenan di Beibel ta produsí algun surjerensia. Kisas Dios ke kòrda nos di pas. Ma e palomba den Beibel no ta ligá ku pas. Otronan ta haña ku talbes e ta referí na puresa. Ta bisá ku palomba ta un bestia hopi limpi. Esaki tambe ta un splikashon dudoso. Mateo 10:16 ta instruí e siguidó di Kristu pa ta “*inosente manera palomba*”. Ta pusíbel ku Hesus a referí inosensia, tenure i suavidad?

2. Awa

Diferente teksto ta duna indikashon den e direkshon ku awa ta simbóliko di Spiritu Santu. Isaias 44:3 ta bisa, “*Pasobra lo Mi basha awa riba e tera ku tin set, i koridanan di awa riba e tera seku; lo Mi basha Mi Spiritu riba bo yunan, i Mi bendishon riba bo desendientenan.*”

Segun Juan 3:5, “*Di bèrdad, di bèrdad, Mi ta bisabo, si un hende no nase di awa i di e Spiritu, e no por drenta e reino.*” Den e mésun Evangelio, Hesus a bisa, “*Si un hende tin set, lagu’ é bin serka Mi i bebe. Esun ku kere den Mi, manera e Skritura a bisa: ‘For di su paden lo kore riunan di awa bibu.’ Ma esaki El a bisa di e Spiritu Kende esnan ku a kere den djE tabata bai risibí; pasobra e Spiritu no a wòrdu duná ainda, pasobra Hesus no a wòrdu glorifiká ainda*” (Juan 7:37-39).

Talbes Hesus tabata papia di Spiritu Santu ora el a bisa e muhé samaritano, “*...ken ku bebe di e awa ku Ami lo dun’ é lo no haña set nunca mas, ma e awa ku Ami lo dun’ é lo bira den djE un fuente di awa ku ta borta pa bida etèrno*” (Juan 4:14).

Kisas Dios ke komuniká e importansia di tin Su Spiritu i ta yená kun’E. Set ta e mester humano mas eksigiente; hende no por biba sin awa. Méskos ku hende no por biba sin awe, nos no por biba sin Spiritu Santu. Otro pusibilidatnan ta ku awa ta satesfasé set, ta refreská, ta alimentá, ta purifiká (Efesionan 5:26; Tito 3:5), ta duna bida i kresementu.

3. Bientu-Brisa-Rosea

Nos ta kòrda ku e palabra griego (NUMA) i e palabra hebreo (RUACH) por nifiká bientu, brisa òf rosea! Den Juan 3:8, Hesus a bisa Nikodemo, “*Bientu ta supla unda ku e kier i bo ta tende su zonidu, ma bo no sa di unda e ta bin ni na unda e ta bai; asina ta tur esnan ku nase di e Spiritu.*” Jòb tambe a duna e mésun indikashon: “*Ta e Spiritu di Dios a trahami, i e rosea di e Todopoderoso ta dunami bida*” (Jòb 33:4). Algun hende lo inkluí tekstonan manera Juan 20:22, unda Hesus a supla riba Su disipelnan i a bisa, “*Risibí Spiritu Santu*” òf Echunan 2:2 ku ta deskribí binida di Spiritu Santu, i esaki tabata kompañá ku “*un zonido for di shelu, manera un bientu violento i fuerte, i esaki a yena henter e kas kaminda nan tabata sintá.*”

Kiko ta e pusíbel nifikashon di bientu òf rosea komo un símbolo di Spiritu Santu? Algun kreyente ta haña ku esaki ta referí na e obra invisibel di Spiritu Santu. Otronan ta di opinion ku esaki ta papia di e obra soberano (independiente di hende) di Spiritu Santu. Òf e por nifiká ku e obra di Spiritu Santu ta bin for di shelu—ku e no ta di hende. Un otro pusibilidat ta ku e obra di Spiritu Santu ta inesperá i diripiente (Ezekiel 8:3; 11:1,5; Echunan 8:39-40). Tambe tin studiante di Skritura ku ta haña ku esaki ta referí na e echu ku un brisa por ta refreskante òf un bientu potente...ma kisas esei tambe ta muchu eksagerá.

4. Zeta

Esaki ta un otro símbolo ku ta mas mihó konosí. Isaias 61:1 ta bisa, “*E Spiritu di Señor DIOS ta riba mi, pasobra SEÑOR a ungi mi pa hiba bon nobo na esnan afligí...*” Hesus a sita e teksto ei den Lukas 4:18: “*E Spiritu di SEÑOR ta riba Mi, pasobra El a ungi Mi pa prediká evangelio na e poberman...*” Pedro a prediká ku “*...Dios a ungi E (Hesus) ku Spiritu Santu i ku poder...*” (Echunan 10:38). I maske 1 Juan 2:20,27 no ta menshoná Spiritu Santu, ta parse ku e ta referí n’E: “*Ma boso tin un unshon di Esun Santu, i boso tur sa. ...I pa loke ta boso, e unshon ku boso a risibí di djE ta permansé den boso, i boso no tin mester di ningun hende pa siña boso, ma manera Su unshon ta siña boso tokante di tur kos, i ta bèrdadero i no ta un mentira, i meskos ku el a siña boso, boso permanesé den djE.*”

Den Tèstament Bieu, zeta tabata usá pa ungi hende na kuminsamentu di nan ministerio. Pusíbel interpretashonnan ta ku zeta ta referí na e echu ku Spiritu Santu ta prepará i kapasitá pa ministerio. Òf kisas e splikashon korekto ta ku zeta ta usá pa iluminá (Mateo 25:4; Eksodo 27:20-21). Talbes esaki ta nifiká ku Spiritu Santu ta revelá Kristu i ta glorifiké i bèrdatnan bíbliko. (Juan 16:14; 1 Juan 2:27)

5. Kandela

Tin teksto ku ta liga Spiritu Santu ku kandela. Juan Boutista a bisa den Mateo 3:11, “*Pa loke t’ami, ami ta batisá boso ku awa pa repentimentu, ma Esun ku ta bin despues di mi ta mas poderoso ku mi...E lo batisá boso ku Spiritu Santu i kandela.*” (Lukas 3:16-17) Loke a sosodé na Pentekostes—ora Spiritu Santu a bin—tambe ta notabel: “*...nan a mira loke tabata parse lenganan di kandela, kualnan a separá for di otro, i a bai para riba kada un di nan. I nan tur a wòrdu yená ku Spiritu Santu...*” (Echunan 2:3-4).

Kisas esaki ta nifiká ku Spiritu Santu ta kima i purifiká (Levítico 10:2; Malakias 3:2-3). Spiritu ta konvensé nos di piká i huisio, i E ta kima tur loke no ta conforme Su boluntat den nos bida. Klaramente Dios ke destruí tur piká den nos bidanan! Ma un otro posibilidad ta ku e símbolo aki ta referí na e echu ku Spiritu Santu ta iluminá.

6. Un Seyo

Den tres teksto Spiritu Santu ta ligá ku un seyo. Segun 2 Korintionan 1:22, Dios “*...a seya nos i a duna nos e Spiritu den nos kurason komo garantia.*” Efesionan 1:13 ta laga sa ku den Hesus “*...boso a wòrdu seyá ku e Spiritu Santu di promesa, Kende ta e garantia di nos erensia, te na e redenshon di e poseshon di Dios...*” Efesionan 4:30 ta bisa, “*...no hasi Spiritu Santu di Dios tristu, pa medio di Kende boso a wòrdu seyá pa e dia di redenshon.*”

Un seyo a wòrdu usá den tempunan antiguo pa proba ku un transakshon a wòrdu kompletá, ku e preis a wòrdu paga, ku tin un akuerdo. (Jeremias 32:9-10 ta un ehèmpel di esaki.) Pues, den e era ei, un seyo a wòrdu usá pa konfirmá i sigurá, pa duna outoridat òf pa indiká propiedat.

Kisas e echu ku e kristian ta seyá ku Spiritu Santu ta nifiká ku Spiritu Santu ta e stèmpel òf seyo ku ta proba ku nos ta propiedat di Dios! E ta e garantia di salbashon di esun ku a konfia den Kristu Hesus komo Salbador! E ta duna siguransa na e kreyente ku e ta salvá.

E símbulonnan di Spiritu Santu ta kontené bèrdatnan presioso. Ma nos mester ta kouteloso pa no ta muchu kategórico den nos interpretashon di Skritura ora Beibel no ta kategórico.